

RI KASANIC CHUXE' YA'

Chupan ri utzilej rutzijol e c'o c'atzinel tak tijonic y takbel. Ri tijonic y ri takbel ri', ri Ajaf rubin can chi c'o chi yeketa-maj y c'o chi yekaben. Jari' e junan quiquin ri tijonic y ri takbel ri e c'o chupan ri Ruk'ataj ri Jesucristo ojer can. Ri c'atzinel tak tijonic ri', ruc'amon chi nikanimaj. Jun takbel jari' jun lok'olej banobel ri nubij ri Dios chi c'o chi nika-ben. Ri ca'i' nabey tak tijonic richin ri utzilej rutzijol jari' ri cukubabel c'u'x riq'uin ri Ajaf Jesucristo, y ri tzolibel c'u'x. Ri nabey takbel richin ri utzilej rutzijol jari' ri kasanic chuxe' ya'. Ri Ajaf xerupixabaj ri ru apostoli', xubij quere': "Romari", quixbiyin, que'itijoj conojel ri vinaki', y que'ikasaj chuxe' ya' pa rubi' ri Tata'ixel, y ri C'ajolaxel, y ri Uxlabi-xel. Que'itijoj chi tiqitakej ronojel ri nubin chive chi tiban-na'" (Mateo 28:19-20).

Tabixaj ri bix rubini'an ri "Ri Uxlaxel Ach'el Jun K'ak'."

¿Achi que ruc'ojol jun tijonic richin ri utzilej rutzijol riq'uin jun takbel?

¿ACHI QUE ROMA NIC'ATZIN CHI YOJKASEX CHUXE' YA'?

NIC'ATZIN CHI YOJKASEX CHUXE' YA' RICHIN CHI YECUYUTEJ NA RI KAMAC

Vi roj nitzolin pe kac'u'x chupan ri kamac y vi yojkasex chuxe' ya', ri kamac yecuyutej roma ri tojbalil mac ri xuben ri Jesucristo.

Ri Biblia nubij chi ri Juan el Bautista "xerukasaj ri vinaki' chuxe' ri ya' pa tz'iran ruvach'ulef, y xutzijoj ri kasanic chuxe' ya' richin tzolibel c'u'x, richin queri' yecuyutej ri mac" (Marcos 1:4). Quere' xubij ri Pedro: "Titzolij pe ri ic'u'x, y quixkasex chiquijunal chuxe' ri ya' pa rubi' ri Jesucristo richin cuyubel ri imac" (Ri Xquibanala' ri Apos-



toli' 2:38). Tok ri Pablo xunimaj y xtzolin pe ruc'u'x, ri Ananías xubij chire: "Cayacatej, cakasex chuxe' ya', y que'ach'aja' el ri amac" (Ri Xquibanala' ri Apostoli' 22:16).

NIC'ATZIN CHI YOJKASEX CHUXE' YA' RICHIN YOJOC CHUPAN RI RUK'ATAJ RI JESUCRISTO

Checonojel ri niquich'utinirisaj qui' chuvech ri Dios y ni-quijiquiba' chiquivech ri k'ataj chi can xtzolin vi pe quic'u'x chupan ronojel ri quimac, rije' xquec'ulutej chupan ri Ruk'ataj ri Jesucristo, roma ri kasanic chuxe' ya' (DyC 20:37).

NIC'ATZIN CHI YOJKASEX CHUXE' YA' RICHIN CHI YOJTIQUIR NIKAC'UL RI UXLABIXEL

Quere' xubij ri Ajaf: Vi xcajel pe viq'uin, y xtzolin pe ac'u'x chupan ri amac, y xcakasex chuxe' ya' pa rubi' ri Junayon Nuc'ajol, rat xtac'ul ri sipanic richin ri Uxlabixel (Moisés 6:52).

NIC'ATZIN CHI YOJKASEX CHUXE' YA' RICHIN NIKANIMAJ RUTZIJ DIOS

Ri Jesucristo manjun rumac. Man riq'uin vi ri', rija' xkasex chuxe' ya'. Rija' xubij chi nic'atzin chire ri kasanic chuxe' ya' richin queri' xutakej ronojel ruchojmilal (tatz'eta' c'a ri Mateo 3:13-15). Ri profeta rubini'an Nefi xutzijoj chi ri ruch'abel ri Ajaf quere' xubij: ". . .quinitzelbej y tibana' ri achique xitz'et chi yin xinben. . . .riq'uin ronojel ivánima y man yixk'olon ta, ni ta chuka' niben ca'i' ipalej chuvech ri Dios. Xa nic'atzin c'a chi nitzelbej rija' riq'uin jun choj irayibal y nitzolin pe ic'u'x chupan ri imac. Riq'uin c'ari', nijiquiba' chuvech ri Tata'ixel chi nivajo' niq'uen ka pan ivi' ri rubi' ri Cristo roma ri kasanic chuxe' ya'" (2 Nefi 31:12-13).

NIC'ATZIN CHI YOJKASEX CHUXE' YA' RICHIN KOJOC NA CHUPAN RI AJAVAREN AJ CHICAJ

Ri Jesús quere' xubij: "Achique c'a ri xquiniman yin y xtikasex chuxe' ya', jari' ri xtichinan ri rajavaren ri Dios. Achique c'a ri man xquiniman ta yin y man xtikasex ta chuxe' ya', jac'ari' ri xtuc'ulumaj rutojbalil mac" (3 Nefi 11:33-34). Ri kasanic chuxe' ya' jari' ri oquibel richin ri ajavaren aj chicaj. Manek chic jun rubeyal y manek chic oquibel richin yojoc acuchi c'o vi ri Ajaf.



Catzijon c'a chirij achique roma nic'atzin ri kasanic chuxe' ya'.

¿ACHIQUE RI KITZIJ RUBANIKUIL RI KASANIC CHUXE' YA'?

C'o xaxe jun kitzij rubanic ri kasanic chuxe' ya' y jari' ri xuk'alajirisaj ri Jesús chuveh ri José Smith. Xubij c'a chi jun vinek ri ruc'uan ri kitzij ruk'atbel tzij ri Dios nuben ri kasanic chuxe' ya'. Noc ka pa ya' ri achin ri oyon pe roma ri Dios y ruc'ulun pe chic ri k'atbel tzij riq'uin ri Jesucristo richin nuben ri kasanic chuxe' ya'. Rachibilan c'a pa ri ya' ri vinek ri petenek richin xtikasex chuxe' ya'. C'a c'ari' xtroyoj c'a riq'uin ri rubi' y quere' xtubij: "Roma c'a ya'on can chuve ri k'atbel tzij roma ri Jesucristo, yin yatin-kasaj chuxe' ya' pa rubi' ri Tata'ixel, y ri C'ajolaxel, y ri Lok'olej Uxlabixel. Amen." C'a c'ari' rija' xtukasaj ka ri vinek chuxe' ri ya' y nrelesaj pe chic chupan ri ya' (DyC 20:73-74). Nic'atzin chi ri vinek niq'uis ka chupan ri ya'. Ri apóstol Pablo xubij chi tok yojkasex chuxe' ya' y yoyacatej chic pe chupan ri ya', jari' junan riq'uin ri camic y ri c'astajibel. Ri aj mac kac'aslen niq'uis tok yojkasex chuxe' ya'. Tok kabanon chic ri kasanic chuxe' ya', nikatiquiriba' jun c'ac'a' c'aslen. Quere' c'a xubij ri Pablo: "¿La man ivetaman ta c'a chi ri kasanic chuxe' ya' ri kac'ulun pa rubi' ri Cristo xa can achi'el ri rucamic queri' ri kac'ulun? Roma junan oj mukun riq'uin rija' che camic roma ri kasanic chuxe' ya'. Queri' c'a, achi'el c'a ri Cristo xc'astej pe chiquicojol ri caminaki' roma ri ruc'o'jlen ri Tata'ixel, queri' chuka' roj kojbiyin chupan jun c'ac'a' c'aslen. Roma vi junan kabanon riq'uin ri Jesucristo roma ri rucamic, can junan chuka' kabanon riq'uin rija' roma ri ruc'astajibal" (Romanos 6:3-5).

Nic'atzin c'a chi ri vinek niq'uis ka chupan ri ya'. Chuka' nic'atzin chi ri kasanic chuxe' ya' niban roma jun achin ri ruc'uan ri k'atbel tzij richin ri Jesucristo. Ja c'ari' ri kitzij rubanic ri kasanic chuxe' ya'.

Tasiq'uij ruveh ri DyC 20:72-74. ¿Achique roma nic'atzin chi jun achin ruc'uan ri k'atbel tzij richin nuben jun kasanic chuxe' ya'?

¿ACHOJCHE NIC'ATZIN VI RI KASANIC CHUXE' YA'?

Checonojel vinaki' ri más chic 8 quijuna' nic'atzin ri kasanic chuxe' ya' chique. Pero xaxe vi manek ruyabil ri quijolon y yetiquir niquiya' ka chiquij ri quibanobal. E c'o ch'a-

ka' chic k'ataj ri niquibij chi ri tak ac'uala' utz yekasex chuxe' ya'. Pero man que ta ri' rubin can ri Ajaf. Tok ri Ajaf xch'o chiquij ri tak ac'uala', quere' xubij: "Ri rajavaren ri caj xa quichin ri e achi'el rije'" (Mateo 19:14). Ri profeta Mormon xubij, chi chuvech ri Dios jari' jun jicanic vi ri vinaki' niquiben ri kasanic chuxe' ya' chique ri tak ac'uala', roma rije' man e aj mac ta. Ri kasanic chuxe' ya' man nic'atzin ta chique ri vinaki' ri man yetiquir ta yenojin y man yetiquir ta niquetamaj achique ri utz y achique ri man utz ta (tatz'eta' c'a ri Moroni 8:9-22). Conojel ri ch'aka' chic vinek nic'atzin chique chi yekasex chuxe' ri ya'. Manek chic jun rubeyal. C'o chi yojkasex chuxe' ya'. C'a c'ari', nic'atzin chi yojbiyin choj richin nikatakej ri c'ulanen tzij ri nikaben riq'uin ri Ajaf tok yojkasex chuxe' ya'. Vi man nikatakej ta ri c'ulanen tzij ri', manek modo richin xkojbec'oje' chic jun bey riq'uin ri Katata' chila' chicaj.

Tac'utuj c'a quere: ¿Achique roma xubij ri Pablo chi tok roj yojkasex chuxe' ya', jari' can junan riq'uin ri rumukic ri Colonel?

Tasiq'uij c'a ruvech ri Moroni 8:11-20. ¿Achique roma man yekakasaj ta ri tak ac'uala' chuxe' ya'?

NUC'UL RI' RI KATZIJ RIQ'UIN RI RUTZIJ RI AJAF TOK YOJKASEX CHUXE' YA'

Ri lok'olej tak tz'ibanic yojquitijoj chire ri kasanic chuxe' ya' (tatz'eta' c'a ri Mosia 18:7-17). Ri profeta Alma xubij chi ri cukubabel c'u'x y ri tzolibel c'u'x yojquichojmirisaj apon y yojquiyukej chupan ri kasanic chuxe' ya'. Rija' xubij chi tok yojkasex chuxe' ya' pa rubi' ri Ajaf, nuc'ul ri' katzij riq'uin ri rutzij ri Ajaf. Nikabij chire ri Ajaf chi can xtikaben ca'i' oxi' cosas. Rija' nubij chike chi xkojruturusaj vi nikaben achique xkabij chire. Ri kasanic chuxe' ya' nikaben, jari' niya'on ri retal chi kabanon c'ulanen. tzij riq'uin ri Ajaf.

Ri Alma xubij chi nic'atzin chi nikarayij nikaya' pa kánima ri rubi' ri Dios. Nic'atzin chuka' chi nic'oje' karayibal richin nikato' ki' chikavech roj konojel. Nic'atzin chuka' chi nika-k'alajirisaj ri Ajaf ronojel mul pa ruvi' ronojel cosas y chupan ronojel c'ojlíbel. Ri Alma xubij vi queri' nikaben, y vi yojkasex chuxe' ri ya', c'ari', ri kamac xquecuyutej. C'a c'ari', xkojyacatej pe chupan ri nabey c'astajibel. Xtiyatej pe chike ri c'aslen richin jumul. Quere' c'a xubij ri Alma: "Titzu' na pe, jare' ri ya' richin ri Mormon. . .vi queri' nu-

rayij ri ivánima, ¿achique c'a roma tok man ta yixkasex chuxe' ya' pa rubi' ri Ajaf? Riq'uin c'ari', rix xtik'alajirisaj chuvech rija' chi ibanon jun c'ulanen tzij riq'uin, richin xtisamajij c'a rija', y xque'itakej ri rupixa' richin queri' rija' xtuya' pe ri Ruxlabal pan ivi''' (Mosia 18:7-17). Ri vinaki' janíla xequicot y xquibij chi xquirayij xekasex chuxe' ya'. C'ari', ri Alma xerukasaj chuxe' ya' chupan ri ya' rubini'an Mormon.

Ri Alma xubij chi tok yojkasex chuxe' ya', nikasuj chire ri Ajaf chi quere' xtikaben:

1. Xkojoc pe chupan ri Ruk'ataj ri Dios.
2. Xtikabini'aj ri ruvinak rija'.
3. Xtikatola' ki' chikavech.
4. Xtikak'alajirisaj ri Ajaf ronojel mul, pa ruvi' ronojel, y chupan ronojel c'ojlibel. vi.
5. Xtikasamajij ri Ajaf y xquekatakej ri rupixa'.

Tok roj yojkasex chuxe' ya' y vi nikatakej ri c'ulanen tzij ri xkaben chiri', ri Ajaf quere' xtuben:

1. Xtucuy ri kamac.
2. Janíla xtuya' pe ri Ruxlabal pa kavi'.
3. XkojrUYUKEJ k'ij k'ij y chuka' xkojruto' riq'uin ri Uxlabi-xel.
4. Xtuya' k'ij chike richin xkojc'astej pe chupan ri nabey c'astajibel.
5. Xtuya' chike ri c'aslen richin jumul.

Tacamuluj ri c'ulanen tzij richin ri kasanic chuxe' ya'.

Catzijon c'a chirij ri achique xtikaben roj y chuka' chirij ri xtuben ri Tata'ixel tok yojkasex chuxe' ya'.

¿Achique modo xtikato' ki' richin chi roj konojel xtikatakej re c'ulanen tzij kabanon tok xkac'ul ri kasanic chuxe' ya'?

RI KASANIC CHUXE' YA' NUYA' CHIKE JUN C'AC'A' RUTIQIRIBEL RI KAC'ASLEN

Tok yojkasex chuxe' ri ya', nikachop jun chic c'ac'a' rubaniquil ri kac'aslen. Romari' nikabij che chi jari' jun chic alaxibel. Ri Jesús xubij chi manek jun rubeyal richin chi jun vinek xtoc chupan ri rajavaren ri Dios, xaxe vi xtalex chic jun bey. Xubij chuka' chi vi jun vinek man xtalex ta

riq'uin ya' y riq'uin espíritu, rija' man xtitiquir ta xtoc apon. pa rajavaren ri Dios (tatz'eta' c'a ri Juan 3:3-5). Ri Dios xusol rij re tijonic re' chuvech ri Adán. Quere' c'a xubij: Rat xatalex pe chuvach'ulef riq'uin ya' y riq'uin quic' y riq'uin espíritu ri xenben yin. Y queri', riq'uin ri pokolaj, rat xatoc jun c'aslic vinek. Can que vi chuka' re', nic'atzin chi rat yatalex pe chic jun bey richin ri rajavaren ri caj roma ri ya' y ri Espíritu, y nic'atzin chi xcach'ajch'ojirisex riq'uin quiq'uel, ja', can riq'uin vi ruqui'uel ri Junayon Nuc'ajol (Moisés 6:59).

Ri apóstol Pablo xubij chi roj nikatiquiriba' chic jun c'ac'a' c'aslen tok xojkasex chuxe' ri ya': “. . .junan oj mukun riq'uin rija' che camic roma ri kasanic chuxe' ya', . . .queri' chuka' roj kojbiyin chupan jun c'ac'a' c'aslen” (Romanos 6:4).

Jun nimalej turusanic richin ri kasanic chuxe' ya' ja ri c'a-c'a' rutiquiribel ri nuya' chupan ri kac'aslen.

¿Achi que roma nikabij chi ri kasanic chuxe' ya' jari' jun chic c'ac'a' tiquiribel?

GH'AKA' CHIC MOCAJ RI UTZ YE'ANIC'OJ

2 Nefi 31:4-7 (achique roma nic'atzin ri kasanic chuxe' ya')

3 Nefi 11:21-27 (achique ri rubanic jun kasanic chuxe' ya')

Hechos 21:38-39 (ri kasanic chuxe' ri ya' nic'atzin chique checonojel ri vinaki' ri nitzolin pe quic'u'x chupan ri quimac)

DyC 20:71 (ri kasanic chuxe' ya' man nic'atzin ta chique ri tak ac'u'ala')

3 Nefi 27:16 (ri kasanic chuxe' ya' jari' jun c'ulanen tzij)

Alma 7:14-16 y Colosenses 2:12 (quixkasex chuxe' ri ya' y quixch'ajch'ojirisex)

RI SIPANIC RICHIN RI UXLABIXEL

Ri profeta José Smith xubij chi roj nikanimaj chi ri sipanic richin ri Uxlabixel nicusex vacami can achi'el xcusex chupan ri k'ij quichin ri nabey apostoli'. Roj nikanimaj re sipanic re' tok can tz'aket vi y riq'uin ronojel ruchuk'a', runiminen, y ruc'ojlemal.

Chupan ri tanaj 7, niketamaj chi ri Uxlabixel ja rija' jun cachibil ri Tata'ixel y ri C'ajolaxel chila' chicaj. Rija' jun espíritu, achi'el rubaniquil jun achin. Manek jun ruch'acul ri c'o ta rubakil y rutiojil. Rija' man nitiquir ta nic'oje' pa ca'i' c'ojlibel jun mul. Man riq'uin vi ri', ri ruchuk'a' rija' c'o xabacuchi. Ri rusamaj ri Uxlabixel richin yeruk'alajirisaj ri Tata'ixel y ri C'ajolaxel y chuka' richin nuk'alajirisaj ri kitzij.

Ri Uxlabixel y *ri sipanic richin ri Uxlabixel*, man e junan ta. C'o rucojolil ri Uxlabixel riq'uin ri *sipanic richin ri Uxlabixel*. Chupan re tanaj re', xtiketamaj achique ri sipanic richin ri Uxlabixel y achique rubeyal richin nikac'ul ri nima-lej sipanic ri'.

Utz nutzijoj jun vinek ri achique retaman chirij ri Uxlabixel (tatz'eta' c'a ri tanaj 7 chupan re vuj re').

¿ACHIQUE CAMI RI SIPANIC RICHIN RI UXLABIXEL?

Tok jun vinek kasan chic chuxe' ya' y jiquiban chic chupan ri K'ataj, niya'ox chire ri sipanic richin ri Uxlabixel. Jari' tok rija' nitiquir nuc'utuj ri to'onic y ri sakirisan nojibel richin ri Uxlabixel. Ri vinaki' ri e c'o chupan ri K'ataj nic'atzin c'a chi rije' e ruc'amon richin xqueruto' ri Uxlabixel y xquerachibilaj chuka'.

Jantek ri vinaki' yeyukex juba' roma ri Uxlabixel tok c'a manjani tiqic'ul ri sipanic richin ri Uxlabixel. Man riq'uin vi ri', ri Uxlabixel man xticanej ta can quiq'uin ri vinek ri',

xaxe vi rije' yekasex chuxe' ya' y niquic'ul ri sipanic richin ri Uxlabixel. Ri rubaniquil nic'ulutej re' ja tok ri achi'a' ri e uc'uayon ri aj chicajel uchuk'a' niquiya' quik'a' pa quivi' ri vinaki' ri'. Ri Biblia, chupan ri vuj rubini'an Hechos, nubij chi c'o jun achin rubini'an Cornelio y xsakirisex runojibal roma ri Uxlabixel richin queri' xretamaj chi kitzij ri utzilej rutzijol ri Jesucristo. Man riq'uin vi ri', ri Cornelio man xuc'ul ta ri sipanic richin ri Uxlabixel, c'a tok xkasex chuxe' ya'. Ri Profeta José Smith xubij chi vi ri Cornelio man ta xkasex chuxe' ya', y vi man ta c'a xuc'ul ri sipanic richin ri Uxlabixel, ri Uxlabixel xel ta el riq'uin (tatz'eta' c'a ri *Enseñanzas del Profeta José Smith* p. 240).

Vacami e q'uiy vinaki' ri man e c'o ta chupan ri K'ataj niquetamaj roma ri Uxlabixel chi kitzij ri Vuj richin ri Mormon (tatz'eta' c'a ri Moroni 10:4-5). Man riq'uin vi ri', ri etamabel ri' nel el quiq'uin vi man niquic'ul ta ri sipanic richin ri Uxlabixel. Rije', man benek ta ruvech niquic'ulumaj ri etamabel ri' achi'el ri niquic'ul ri vinaki' ri quic'ulun chic ri sipanic richin ri Uxlabixel.


Catzijon juba' chirij ri sakirisan nojibel ri nuya' ri Uxlabixel y chuka' chirij ri sipanic richin ri Uxlabixel. ¿Achique camí rucojollí re ca'i' na'oj re'?

¿ACHIQUE MODO NIKAC'UL RI SIPANIC RICHIN RI UXLABIXEL?

Niya'ox ri Uxlabixel chique ri vinaki' ri e kasan chic chuxe' ya' y e jiquiban chic chupan ri K'ataj. Ri e Runimakul ri K'ataj (élderes) niquiya' quik'a' pa quivi' ri vinek richin ni-quik'axaj chuka' chique rije' ri sipanic richin ri Uxlabixel. Tiya' c'a ik'a' pa quivi' ri quicukuban quic'u'x y que'ijjiquiba' chupan ri nuk'ataj. Y yin xtinya' ka pa quivi' rije' ri sipanic richin ri Uxlabixel (DyC 33:15).

Conojel ri e Runimakul ri K'ataj, vi rije' e ruc'amon y vi ya'on pe ri k'atbel tzij chique, yetiquir c'a niquik'axaj ri sipanic richin ri Uxlabixel chique ch'aka' chic vinaki'. Man riq'uin vi ri', man jiquil ta chi ri vinaki' ri' can xtiquic'ul ri ruto'onic ri Uxlabixel, xaxe roma ri xquiben ri e Runimakul (élderes). Chiquijujunal ri vinek nic'atzin chi niquic'ul ri sipanic richin ri Uxlabixel. Jari' nibec'ulun chikavech chi ri Uxlabixel xtoruto' jun vinek xaxe vi ri vinek ri' can ruc'amon vi y can nurayij vi ri to'onic richin ri Uxlabixel.

Jun vinek nic'atzin chi rija' janfla nutij ruk'ij richin yeruta-



kej conojel ri rupixa' ri Dios richin queri' rija' can ruc'amon vi richin nuc'ul ri to'onic richin ri Uxlabixel. Nic'atzin chi ch'ajch'oj ri nubanala' y ri nunojila'. Ri Presidente David O. McKay xubij chi chupan ri kac'aslen, janíla nic'atzin chi roj yojch'acon chiquij ri itzel tak na'oj. Nic'atzin chi nikatz'et ri itzel tak karayibal. Jari' ri oyoval, ri etzelanic, ri xoch'inic, y ri tz'il tak kabanobal. Nic'atzin chi yojch'acon chiquij, y nikakasaj quik'ij, y yekokotaj el kiqu'uin. Re' nic'atzin roma ri Dios rubin chi ri Espíritu richin ri Ajaf man nic'oje' ta chupan tz'il tak jay (tatz'eta' c'a ri Elaman 4:24). Chuka' xubij chi ri Espíritu richin ri Ajaf man xtutij ta ruk'ij jantape' quiqu'uin ri vinaki' (tatz'eta' c'a ri 2 Nefi 26:11).

¿Achique xtikaben roj richin chi ri Uxlabixel xtic'oje' kiqu'uin jantape'?

JUN CHIQUE RI NIMALEJ TAK SIPANIC RICHIN RI DIOS

Ri sipanic richin ri Uxlabixel jari' jun chique ri nimalej tak sipanic ri nuya' ri Dios chique ri achi'a'. Roma ri Uxlabixel, c'o modo chi niketamaj chi ri Dios q'ues. Niketamaj chuka' chi ri Jesús ja rija' ri Cristo. Chuka' niketamaj chi ri Ruk'ataj ri Jesucristo xya'ox chic pe jun bey chuvach'ulef. C'o chuka' modo richin chi ri Uxlabixel nuc'uaj kabey richin queri' niketamaj ri nikaben ri utz (tatz'eta' c'a ri 2 Nefi 32:5). C'o chuka' modo chi yekac'ul ri sipanic ri yeruya' pe ri Uxlabixel (tatz'eta' c'a ri tanaj 22 chupan re vuj re'). Re nimalej sipanic ri petenek riq'uin ri Tata'ixel xtuya' uxlanibel pa kánima y xtuben chi xtik'ax chikavech ri achique richin ri Dios (tatz'eta' c'a ri 1 Corintios 2:9-12).

¿Achique modo yojruto' ri Uxlabixel?

CH'AKA' CHIC MOCAJ RI UTZ YE'ANIC'OJ

1 Corintios 3:16-17, DyC 130:21-23 (ri Uxlabixel nic'anej can quiqu'uin ri vinaki' ri e ruc'amon)

Moroni 8:25-26 (achique modo nikac'ul ri Uxlabixel)

Moroni 10:5 (ri Uxlabixel nuk'alajirisaj ri kitzij)

JUN BIX RI UTZ NABIXAJ

"Ri Uxlabixel Achi'el Jun K'ak"

RI SIPANIC RI YERUYA' RI UXLABIXEL

Tok banon chic ri kasanic chuxe' ya' chike, ri e Runimakul ri K'ataj (élderes) xquiya' quik'a' pa kavi' richin xquiya' chike ri sipanic richin ri Uxlabixel. Vi roj nikaben ri utz, ri Uxlabixel xtic'oje' kiq'uin jantape'. Roma ri Uxlabixel, roj yojtiquir nikac'ul lok'olej tak uchuk'a'. Ri uchuk'a' ri' rubi-ni'an *ri sipanic ri yeruya' ri Uxlabixel*. Re sipanic re' yeya'-ox xaxe chique ri niquitakej ri rupixa' ri Dios. Re sipanic re' yojquito' richin niketamaj ri utzilej rutzijol y chuka' richin yekatijoj ri ch'aka' chic vinaki' chire. Yojquito' richin chi roj chuka' xquekato' ri ch'aka' chic vinaki'. Yojquiyukej richin xkojtzolin riq'uin ri Chicajel Katata'. Nic'atzin chi niketamaj achique re sipanic re' richin queri' xtiketamaj quicusaxic. Nic'atzin chuka' chi niketamaj achique modo xtikac'ul re sipanic re'. Y nic'atzin chuka' chi niketamaj achique modo yeruq'uexvachij ri Satanás re lok'olej tak sipanic re'.

¿Achique roma tok ri Ajaf e ruya'on chike nimalej tak sipanic?

RI SIPANIC RI YERUYA' RI UXLABIXEL

Ri lok'olej tak tz'ibanic yequitzijoj e q'uiy ruvech sipanic ri yeruya' ri Uxlabixel. Re sipanic re' jantape' yeyatej pe chique ri vinaki' ri e c'o chupan ri kitzij Ruk'ataj ri Cristo chuvach'ulef. Re sipanic re' niquik'alajirisaj ri kitzij Ruk'ataj ri Jesucristo (tatz'eta' c'a ri Marcos 16:16-18). Man riq'uin vi ri', man c'ayef ta chire ri Satanás richin yeruq'uexvachij re lok'olej tak sipanic re'. Roma c'ari', man xaxe ta re sipanic re' ri e k'alajirisayon richin ri Ruk'ataj ri Jesucristo.

RI SIPANIC RICHIN CH'ABEL (DyC 46:24)

C'o bey nic'atzin chi nikach'abalij ri utzilej rutzijol pa jun ch'abel ri man ketaman ta. Vi quere' nic'ulvachitej, c'o


modo chi ri Ajaf yojruto' y nuya' k'ij chike richin yojch'o pa ri ch'abel ri'. E janíla ch'abalinela' quic'ulun ri sipanic richin ch'abel tok nic'atzin chique. Jun ch'abalinel rubini'an Alonzo A. Hinckley c'o pa jun chic tinamit c'anej rubini'an Holanda. Rija' man can ta utz retaman ri quich'abel ri vinek chiri'. Rija' ya xuc'utuj yan chire ri Ajaf chi tuto' na. Man riq'uin vi ri', man can ta utz xch'o chupan ri ch'abel ri' y man can ta utz xk'ax chuvech. Jun k'ij, rija' xuc'ojc'aj ruchi' jun jay. Tok ri ixok xujek ri ruchi' jay, janíla royoal. Ri ixok ri' yalan xuch'olij ri ch'abalinel ri'. Rija' xumey roma xk'ax chuvech ri xubij ri ixok chire. Rija' xrajo' xujiquiba' chuvech ri ixok chi can kitzij vi ri utzilej rutzijol. Jari' tok xuchop ch'oven y man c'ayef ta xuben chuvech richin xch'o pa ruch'abel ri ixok. C'a c'ari', ri ch'abalinel xbe riq'uin ri presidente richin ri misión y xubij chire chi retaman chic nich'o pa quich'abel ri vinaki' chiri'. Man riq'uin vi ri', tok xch'o riq'uin ri presidente, xa man xtiquir ta chic xch'o chupan ri ch'abel ri'. E q'uiy vinaki' ri e c'o chupan ri K'ataj quic'ulun ri sipanic richin ri ch'abel.

RI SIPANIC RICHIN NIKAC'AXAJ CH'AKA' CHIC CH'ABEL (DyC 46:25)

Re sipanic re' niya'ox chike tok nic'atzin chike nikac'ul jun ch'abel richin ri Dios pero tzijon pa jun chic ch'abel ri man nik'ax ta chikavech. Ri Presidente David O. McKay janíla xurayij xch'o quiq'uin ri vinaki' pa jun tinamit rubini'an Nueva Zelandia. Pero rija' man xrajo' ta chi c'o jun chic achin richin nucamuluj rubixiquil chupan jun chic ch'abel. Rija' xubij chique ri vinaki' chi rija' xrajo' chi ri Ajaf xqueruto' richin queri' nik'ax ruch'abel chiquivech. C'a c'ari', rija' xch'o quiq'uin ri vinaki' ri' chupan ruch'abel inglés. 40 minutos xch'o quiq'uin. Najin che ch'oven, rija' utz'et chi ri ruch'abel can xk'ax vi chiquivech.

RI SIPANIC RICHIN RUK'AXAXIC RI CH'ABEL (DyC 5:4)

Vi ri yukenela' chupan ri K'ataj yojroyoj richin nikak'axaj ri ruch'abel ri Ajaf pa jun chic ch'abel, jari' tok utz nikac'ul ri sipanic ri richin ruk'axaxic ri ch'abel. Queri' xtikak'axaj janíla utz chupan ri jun chic ch'abel ri'. Nic'atzin chi yojbiyin choj chuvech ri Ajaf y nikatijoj ki', y yojch'o ak'anij riq'uin ri Ajaf richin queri' xtikac'ul re sipanic re'. Tok nikaben ri



utz quere', ri Ajaf nuben chike chi nuna' ri kánima chi ri kak'axan chupan ri jun ch'abel chic can utz vi (DyC 9:8-9). Ri José Smith c'o re sipanic re' riq'uin tok xuk'axaj ri Vuj richin ri Mormon pa ruch'abel rija'. Rija' xuc'ul re sipanic re' xaxe tok c'o ri Uxlabixel riq'uin.

RI SIPANIC RICHIN UTZILEJ NOJIBEL (DyC 46:17)

Ch'aka' chic vinaki' ri e c'o chupan ri K'ataj niya'ox k'ij chique richin nik'ax chiquivech ri achique niquiben ri ch'aka' chic vinaki'. Nik'ax chuka' chiquivech ri tijonic richin ri utzilej rutzijol y ri achique roma nic'atzin ri tijonic chupan ri kac'aslen. Quere' c'a nubij ri Biblia: "Vi c'o jun chive rix ri nic'atzin etamabel chire, tuc'utuj c'a chire ri Dios. Roma rija' man nuq'ueq'uej ta richin nuya' etamabel chique conojel ri yec'utun chire y man nuch'olij ta. Xa can xtuya' vi chire" (Santiago 1:5). Ri Ajaf quere' xubij can: Man c'a tacanoj ri beyomel, xa tacanoj ri utzilej etamabel. Y tatzu' na pe, ri evan etamabel richin ri Dios xquek'alajirisex chavech (tatz'eta c'a DyC 6:7).

RI SIPANIC RICHIN ETAMABEL (DyC 46:18)

Checonojel ri vinaki' ri xque'oc junan riq'uin ri Tata'ixel xtiquetamaj ronojel. Ri retamabal ri Dios y chuka' ri rupixa' yek'alajirisex pe roma ri Uxlabixel (DyC 121:26). Manek modo richin yojcolotej vi man ketaman ta rupixa' ri Dios (DyC 131:6). Ri Ajaf quere' rubin can: Vi jun vinek nril más etamabel y ri runojibal chupan re c'aslen re' que chuvech jun chic vinek, y rija' xuben quere' roma ri xutij más ruk'ij, y xunimaj tzij, vi queri' c'a xuben, chuka' xtic'oje' más ruk'ij ri jun vinek ri' chuvech ri jun chic chupan ri c'aslen petenek (DyC 130:19). Ri Ajaf rubin chike chi tike-tamaj ronojel achique ri yojtiquir chirij ri rusamaj. Rija' nurayij chi roj niketamaj chirij ri caj y chuka' chirij ri ruvach'ulef. Nurayij chuka' chi niketamaj ri achique xc'ulvachitej can, y ri achique nic'ulvachitej chupan ri katinamit, y chupan ch'aka' chic tinamit (tatz'eta' c'a ri DyC 88:78-79). Man riq'uin ta ri', e c'o vinaki' ri nicajo' niquil ri etamabel quiyon oc. Rije' man niquic'utuj ta utzil richin yeruto' ri Uxlabixel. Je c'a rije' ri jantape' niquito' qui', y manjun bey yetiquir ta yebe'apon chiretamaxic ri kitzij (2 Timoteo 3:7). Tok ri Uxlabixel nuk'alajirisaj ri kitzij chikavech, rija' nich'o

pa kánima y pa kanojibal. C'a c'ari' roj nikana' ri kitzij ri nik'ak'er pa kánima (DyC 8:2).

¿Achique camí nic'atzin chi roj níketamaj? (Tasiq'uij c'a chuka' ruvech ri DyC 90:15.) Tasiq'uij c'a ruvech ri 2 Nefi 9:28-29 y DyC 88:118. ¿Achique camí ri utzilej rubeyal richin níkil ri etamabel?

RI SIPANIC RICHIN NIKAK'ALAJIRISAJ RI UTZILEJ NOJIBEL Y RI ETAMABEL (Moroni 10:9-19)

E c'o jujun vinaki' ri niya'ox chique richin níquik'alajirisaj chirij ri utzilej rutzijol. Utz níkacusaj re sipanic re' tok yekatijoj ri ch'aka' chic vinaki' chupan ri K'ataj. Ri te'ej tata'-aj utz níquicusaj re sipanic re' richin yequitijoj ri calc'ual. Utz níkacusaj re sipanic re' chuka' richin yekatijoj ch'aka' chic vinaki' chire ri utzilej rutzijol.

¿Achique roma nic'atzin chi roj nic'oje' ri Espíritu richin ri Ajaf k'iq'uin richin yekatijoj ri ch'aka' chic vinaki'? (tatz'eta' c'a ri DyC 42:14).

RI SIPANIC RICHIN NIKETAMAJ CHI RI JESUCRISTO JA RIJA' RI RUC'AJOL RI DIOS (DyC 46:13)

Jare' ri sipanic ri ya'on chique ri profeta'i' y ri apostoli' ri e cha'on quivech richin níquik'alajirisaj ri Jesucristo. Man riq'uin vi ri', re sipanic re' niya'ox chique ch'aka' chic vinaki' chuka'. C'o modo chi conojel ri vinaki' níquetamaj. Ri Uxlabixel nítiquir nuk'alajirisaj pa ránima jun vinek chirij ri Jesucristo chupan jun achic' o jun tz'etonic. Ronojel re', janíla lok'olej y romari' tok man can ta yojch'o chirij. Ri kach'alal Orson F. Whitney xya'ox jun tz'etonic chuvech richin xutz'et ri Colonel chupan ri cotz'ijbel rubini'an Getsemani. Rija' xutz'et chi ri Ajaf janíla xutij pokonal, y tok xutz'et ri', xok'. C'a c'ari', ri Ajaf xberuk'etej pe y xuturusaj.

RI SIPANIC RICHIN NIKANIMAJ RI NÍQUIK'ALAJIRISAJ RI CH'AKA' CHIC VINAKI' (DyC 46:14)

C'o modo chi níketamaj ronojel ri kitzij roma ri Uxlabixel. Vi níkajo' níkanabej vi kitzij ri nubij jun chic vinek, nic'atzin chi níkac'utuj chire ri Dios riq'uin ronojel kacukubabel c'u'x. Vi kitzij ri nubij ri jun chic vinek, ri Ajaf xtuya' uxlabibel c'u'x pa kánima (tatz'eta' c'a ri DyC 6:22-23). Queri', c'o modo níketamaj vi jun achin nutzijoj ri kitzij. C'o chuka' modo richin níketamaj vi jun profeta ruc'ulun jun k'alajirisanic. Ri Nefi xuc'utuj chire ri Ajaf chi tuto' na chutz'e-



tic y chuna'ic pa ránima chi can kitzij vi ri rachic' ri rutata' (tatz'eta' c'a ri 1 Nefi 10:17-19).

¿Achiqhe camí modo xtiketamaj vi kitzij ri nutzijoj jun chic vinek?

RI SIPANIC RICHIN RI LOK'OLEJ RUTZIJOL (DyC 46:22)

Vi ri Ajaf nuk'alajirisaj chuvech jun vinek ri xc'ulvachitej can, o ri nic'ulvachitej vacami, o ri xtic'ulvachitej chikavech apon, ri vinek ri' c'o riq'uin ri sipanic richin ri lok'olej rutzijol. Ri profeta'i' quic'uan re sipanic re'. Roj chuka' yojtiquir nikil re sipanic re'. Re sipanic re' yojruto' richin yojbiyin choj chupan ri kac'aslen (tatz'eta' c'a ri 1 Corintios 14:39). C'o modo chi ri Ajaf nuk'alajirisaj pe chikavech ri achiqhe nic'atzin chike chupan ri kac'aslen y chuka' chupan ri kasamaj chupan ri K'ataj. Pero rija' manjun bey xtuk'alajirisaj chikavech ri achiqhe nic'atzin chire chijun ri K'ataj, o ri nic'atzin chique ri yukenela' chupan ri K'ataj. Jun vinek man nitiquir ta nuc'ul k'alajirisanic chirij jun vinek ri c'o más k'atbel tzij riq'uin chuvech rija'. Vi can kitzij c'o kiq'uin ri sipanic richin ri lok'olej rutzijol, man xtikac'ul ta jun chic k'alajirisanic ri man nuc'uaj ta ri' riq'uin ri rubin ri Ajaf chupan ri lok'olej tak tz'ibanic.

Tasiq'uij c'a ruvech ri 1 Corintios 14. ¿Achiqhe nitiquir nic'ulun richin ri sipanic richin ri lok'olej rutzijol?

RI SIPANIC RICHIN RI C'ACHOJIRISABEL (DyC 46:19-20)

Ch'aka' chic vinaki' niquicukuba' quic'u'x richin queri' yequic'achojirisaj ri yava'i'. Y ch'aka' chic niquicukuba' quic'u'x richin queri' rije' yec'achojirisex. C'o modo chi roj konojel nikacukuba' kac'u'x richin yojc'achojirisex tok yojyavej (tatz'eta' c'a ri DyC 42:48). E q'uiy achi'a' ri quic'uan ri aj chicajel uchuk'a', rije' c'o quiq'uin ri sipanic richin yequic'achojirisaj ri yava'i'. Chique ch'aka' chic vinaki' niya'ox etamabel richin yequic'achojirisaj ri yava'i'.

Tasiq'uij c'a ruvech ri DyC 42:43-44. ¿Achiqhe utz nikaben tok oj yava'?

RI SIPANIC RICHIN NIKABEN LOK'OLEJ TAK SAMAJ (DyC 46:21)

C'o bey ri Ajaf yeruturusaj ri ruvinak quiq'uin lok'olej tak samaj. Jun juna' ri nabey tak Mormones chiri' pan Utah xquiben ri quitico'n. C'a c'ari', ri sac' juba' man xquiq'uis jumul ri tico'n ri'. Ri vinaki' yalan xquic'utuj chire ri Ajaf

chi querucolo' el. C'ari' ri Ajaf xutek pe jun k'ataj ajxic' tak chicopi'. Ri ajxic' tak chicopi' ri' xequitij ri sac' ri yetajin chuq'uisic ri tico'n. Tok janíla nic'atzin jun utzil chike, ri Ajaf nuben lok'olej tak banobel koma roj. Pero nic'atzin chi roj nikacukuba' kac'u'x riq'uin rija'. Vi re lok'olej bano-bel re' can nic'atzin vi chike, ri Ajaf xtuben (tatz'eta' c'a ri Mateo 17:20 y ri DyC 24:13-14).

RI SIPANIC RICHIN RI CUKUBABEL C'U'X (Moroni 10:11)

Ri runimal ri Jared c'o riq'uin ri sipanic richin ri cukubabel c'u'x. Rija' xeruc'ul ch'aka' chic sipanic roma can cukul vi ruc'u'x. Janíla nim ri rucukubabel c'u'x ri runimal ri Jared y romari', ri Colonel xuc'ut ri' chuvech (tatz'eta' c'a ri Eter 3:9-15). Vi manek cukubabel c'u'x, manjun chic sipanic niya'ox pe. Quere' c'a xubij ri Moroni: "Can kitzij vi ninbij chive chi xabachique ri niniman ri Cristo y man nuben ta ca'i' ruc'u'x, xtiya'ox c'a chire xabachique ri xtuc'utuj chire ri Tata'ixel pa rubi' ri Cristo" (Mormon 9:20-21). Nic'atzin chi nikanimirisaj ri kacukubabel c'u'x, y nikanabej achique ri sipanic ri ya'on chike, y tikacusaj c'a ri sipanic ri'.

Ch'aka' chic vinaki' man can ta nim ri quicukubabel c'u'x. Roma c'ari', rije' niqubij chi ri sipanic ri' xa e manek. Quere' nubij ri Moroni chique ri vinek ri queri' niqubij: "Yich'o c'a chuka' iviq'uin rix ri nixutuj ri ruk'alajirisanic ri Dios. Rix nibij chi xa e k'ilon can y chi manek chic k'alajirisanic, ni ta chuka' ruya'ic lok'olej rutzijol, ni lok'olej tak sipanic, ni ak'omanic, ni ch'oven pa jalajoj ruvech ch'abel, ni ri ruk'axaxic tak ch'abel. Kitzij ninbij c'a chive chi ri nixutun ronojel re', man retaman ta ri utzilej rutzijol ri Cristo. Kitzij c'a chi man rutz'eton ta ruvech ri lok'olej tz'ibanic, y vi rutz'eton, man k'axinec ta chuvech" (Mormon 9:7-8).

C'O MODO RICHIN NIKANIMIRISAJ RI KASIPANIC

Ri Ajaf quere' xubij: Roma man e ya'on ta conojel ri lok'olej tak sipanic ri' chique checonojel. E c'o c'a q'uiy lok'olej tak sipanic y niya'ox jun lok'olej sipanic chique chiquijujunal ri vinaki' roma ri Espiritu richin ri Dios. Niya'ox jun chire jun vinek y niya'ox jun chic chire jun chic vinek, richin queri' conojel xqueto'ox (DyC 46:11-22).

Nic'atzin chi nikanabej achique ri sipanic e c'o kiq'uin richin queri' xtikanimirisaj ri sipanic ri'. Re' nikanabej xaxe tok yojch'o riq'uin ri Dios y yojmevayin. Nic'atzin chi nikacanoj ri más utzilej tak sipanic (tatz'eta' c'a ri DyC 46:8). C'o bey chuka' ri turusanic ri nuya' ri Nimatata'al nubij chike achique ri sipanic ri e ya'on chike.

Nic'atzin chi nikanimaj tzij y nikacukuba' kac'u'x richin chi xqueya'ox pe ri kasipanic. C'a c'ari', nic'atzin chi nikacusaj ri sipanic ri' richin nikaben ri rusamaj ri Ajaf. E ya'on pe chike man richin ta nikaben ri nrajo' ri kanojibal, y man richin ta nic'ut jun retal chikavech tok manek kacukubabel c'u'x. Vi roj nikac'utuj jun retal, y nikac'ul tok man cukul ta kac'u'x, jari' xa xtajilex quiq'uin ri kamac (tatz'eta' c'a ri Alma 30:50). Yeya'ox pe ri kasipanic richin yekacusaj chunimirisaxic ri rajavaren ri Dios y chuka' richin más yojtique' chupan ri kitzij.

Catzijon c'a juba' chirij ri rubanic xtikanabej ri kasipanic.

¿Achique xtuben ri Satanás richin chi roj man utz ta xtikacusaj ri sipanic ri'?

RI SATANAS YERUQ'UEXEVACHIJ RI SIPANIC RI E RICHIN RI UXLABIXEL

Ri Satanás nitiquir yeruq'uexevachij ri sipanic ri e richin ri Uxlabixel. Nitiquir nuben achi'el vi ta e c'o ri sipanic riq'uin. Pero xa man que ta ri'. Ri Moisés c'o chi xeruch'ec ri suk'ubel ri xeruben ri Satanás chuvech ri k'atbel tzij richin Egipto (tatz'eta' c'a ri Exodo 7:8-22). Ri Satanás nurayij chi roj yekanimaj ri ru profeta'i' rija' y ri c'achojirisanela' y ri aj banoy nimalej tak samaj ri e richin rija'. Pero rije' xa man e kitzij ta. Riq'uin juba' roj xkojk'olotej y nikanimaj chi e kitzij rije'. Romari', nic'atzin chi nikac'utuj ak'anij chire ri Ajaf chi tuya' chike ri sipanic richin nabenic. Queri' c'a roj yojtiquir nikanabej ri kitzij y ri man kitzij ta. Ri Satanás nitiquir noc jun ángel richin sakil. Ri Satanás nurayij chi roj yojmoyirisaj, richin queri' man nikatz'et ta ri kitzij. Nurayij chi roj man nikacanoj ta ri utzilej tak sipanic ri e richin ri Uxlabixel. Ri aj t'iy, ri ajk'ij, y ri aj itz, conojel c'are' xa e richin ri Satanás. Riq'uin juba' niquibij chi e richin ri Dios, pero man que ta ri'. Ri quibanobal rije' janíla e itzel chuvech ri Ajaf (tatz'eta' c'a ri Isaías 47:12-14 y ri Deuteronomio 18:9-10). Nic'atzin chi nikach'er ki' jumul riq'uin ri rubanobal ri Satanás y ri rusamajela' rija'.

¿Achique çami modo xtikanabej vi jun sipanic can richin vi ri Dios o xa richin ri Satanás?

NIC'ATZIN CHI NIKALOK'OK'EJ RI SIPANIC RI E RICHIN RI UXLABIXEL

Ri Ajaf quere' nubij: Yin ninya' jun pixa' chique, chi man xtiquibananej ta coma re cosas re', ni man ta chuka' xquequitzijoj chuech ri ruvach'ulef. Roma yeya'ox chive re cosas richin chi rix ye'icusaj y richin nivil icolotajic" (DyC 84:73). Nic'atzin chi noka' chikac'u'x chi ri sipanic ri e richin ri Uxlabixel e petenek riq'uin ri Dios.

Jare' ri nuc'utuj chike ri Ajaf richin nikaben: C'o c'a chu-ka' chi nimatioxij chire ri Dios riq'uin Espiritu roma xaba-chique ruvech turusanic ri nic'ul pa ruk'a' (DyC 46:32).

¿Achi que modo xquekalok'ok'ej ri sipanic ri yeruya' pe ri Uxlabixel chike?

CH'AKA' CHIC MOCAJ RI UTZ YE'ANIC'OJ

3 Nefi 29:6-7 (ri xtiquic'ulvachij ri ye'evan ri sipanic ri e richin ri Uxlabixel)

Moroni 10:7-19 (manek ri sipanic ri e richin ri Uxlabixel vi manek cukubabel c'u'x)

1 Corintios 12:1-31 (ri sipanic ri e richin ri Uxlabixel)

Hechos 10 (niya'ox jun sipanic chire jun vinek tok rija' nikasex chuxe' ya')

DyC 46:9-26 (ri sipanic ri e richin ri Uxlabixel)

CA'I' BIX RI UTZ YE'ABIXAJ

"¿Achi que ri Kitzij?,"

"Ri Uxlabixel Achi'el Jun K'ak'"